

nach Verfliessung deren dise Holzwax der Hofmarch Euchenhofen
widerumben anhaimbs gefallen wehre

[fol. 247r]

Indem mann aber vnder dessen von Ir Churfürstlich
Durchlaucht wegen zu Behueff des alhiesigen Werckhs
obbesagten verstandnermassn anfangs nur vf Abschier
erhandlten Holz Gründt Muggenthall von dennen
Rosenbuschischen Erben zu Euchenhofen sambt noch anderen
füfff Holzwachsen, nemblichen das Spabereckh, Stain,
Paurn- vnd Köglholz, auch das Rauche Stockha,
also in allem 6 Holzgründt, Inhalt ordentlichen Kauff-
brieffs *dato* 19ten *9bris Anno* 1677 mit Grund
vnnd Poden, aller Podmessigkheit vnnd *Jurisdiction*
per 7600 Gulden, als alle frey eigenthombliche Wal-
dungen erkaufft, welche ordentlich beschriben vnnd mit
Stainnen, darauf Ihro Churfürstlich Durchlaucht khliennere
Wappen vnd darunder die Buechstaben **P.** vnnd **K.**,
auch die Jahr Zahl *Anno* 1678¹⁰⁰ eingehaut, vermarcht.
Als sinndt solche höchstgedacht *S^r* Churfürstlich Durchlaucht nun-
mehr zuegehörige 6 aigne Stuckh vmb khonfftiger
Nachrichts Willen diss Orths dem *Inuentario* ebenfahls
gebürent einverleibt

Dann ist zum Churfürstlichen Preuambt Kelhamb von Ge-
mainer Statt alda vermög *Cessions-Briefs de dato*
14. *Martj Anno* 1681 in Ansehung höchstgedacht

[fol. 247v]

Ihr Churfürstlich Durchlaucht von dennen Vasgroschen Geltern
nit allain die Paufelligkeiten bey der Kuppel
des neuen Rhattaus Wendten, sondern auch vnder-
schidliche anndere *Reparationes* bey dennen Statt Mauer-
gängen vnnd Tachungen vornemmen lassen, dargegen
der Lerchenturn sambt dem Ein- oder Gemeingang mit
aller *Jurisdiction*, Recht vnnd Gerechtsambe zu schuld-
gister vnnderthenigister *Recognition* ybergeben worden.
Also das bemelten Gang vnd Thurn man nun nach
genedisten Gefallen zu anderwertigen Gepeyen, wie
es dem Werckh dienstlich, *appliciern* kann

¹⁰⁰ Im Rechnungsbuch 1680/81, bei der der bisher ersten und einzigen Überlieferung der Schilderung dieses Vorgangs war angegeben worden, daß die Jahreszahl 1677 eingemeißelt worden war! Allerdings war dort angegeben worden, daß die Vermarkung noch nicht durchgeführt worden war. Sh. RB 1680, S. 268.